

儒宗理要

今世有二弊。法弊時弊。法弊但一切更改之。却甚易。時弊則皆在人。人皆以私心爲之。如何變得。嘉祐間法可謂弊矣。王荊公未幾盡變之。又別起得許多弊。以人難變故也。揚

今日之法。君子欲爲其事。以拘於法而不得。騁小人却徇其私。敢越於法而不之顧。人傑

今人只認前日所行之事而行之。便謂之循典故也。須揀箇是底始得。學蒙

古人爲政一本於寬。今必須反之以嚴。蓋必如是矯之。而後有以得其當。今人爲寬。至於事無統紀。緩急予奪之權皆不在我。下梢却是姦豪得志。平民既不蒙其惠。又反受其殃矣。海若

爲政如無大利害不必議更張則所更一事未必成。閔然成紛擾卒未已也。至於大家且假借之。故子產引鄭書曰。安定國家必大焉先。人傑

因言處置天下事直是難。救得這一弊少間就這救之之心。又生那一弊。如人病寒下熱藥少間又變成燥熱。及至病熱下寒藥少間又變得寒。到得這家計壞了。更支吾不住。問

問州縣間寬嚴事。旣已聞命矣。若經世一事使先生見用。其將何先。曰亦只是隨時。如壽皇之初是一樣。中間又是一樣。只合隨時理會。問今日之治奉行祖宗成憲。然太祖皇帝以來至今其法亦有弊而當更者。曰亦只是就其中整理。如何便

超出做得如薦舉如科場如銓試就其中從長整理問向說諸州廂禁軍與屯戍大軍更互教閱如何曰亦只是就其法整理既而歎曰法度尚可移如何得人心變易各人將他心去行法德明

井田封建

井田之法要行須是封建令逐國各自去理會如王畿之內亦各有都鄙家鄙漢人嘗言郡邑在諸國之外而遠役於中都非便問漢以王國雜見於郡縣間如何曰漢本無法度德明

問市廛而不征此市在何處曰此都邑之市人君國都如井田樣畫爲九區而朝背市左祖右社中間一區則君之宮室宮

室前一區爲外朝。凡朝會藏庫之屬皆在焉。後一區爲市。市四面有門。每日市門開。則商賈百物皆入焉。賦其廛者。謂收其市地錢。如今民間之鋪面錢。蓋逐末者多。則賦其廛而抑之。少則不廛。而但治以市官之法。所以招徠之也。市官之法。如周禮司市平物價。治爭訟。譏察異服。異言之類。市中惟民乃得入。凡公卿大夫有爵位者。及士者。皆不得入。入則有罰。如國君過市。則刑人。赦夫人過市。則罰之。幕世子過市。則罰之。帶命夫命婦過市。則罰之。蓋帷之類。左右各三區。皆民所居。而外朝一區。左則宗廟。右則社稷在焉。此國君都邑規模之大槩也。

封建實是不可行。若論三代之世，則封建好處，便是君民之情相親，可以久安而無患，不似後世郡縣，一二年輒易。雖有賢者，善政亦做不成。淳

問後世封建郡縣，何者爲得？曰：論治亂，畢竟不在此。以道理觀之，封建之意，是聖人不以天下爲己私，分與親賢共理。但其制則不過大，此所以爲得。賈誼於漢言衆建諸侯而少其力，其後主父偃竊其說用之於武帝。端蒙

柳子厚封建論，則全以封建爲非。胡明仲輩破其說，則專以封建爲是。要之天下制度，無全利而無害底道理。但看利害分數如何，封建則根本較固，國家可恃；郡縣則截然易制。然來

來去去無長久之意不可恃以爲固也如役法亦然荆公只見差役之害而免役之利先生云差役時皆土著家戶人州縣亦較可靠免役則皆浮浪之人靖康間州縣亦有守令要守而吏民皆散去無復可恃然其弊亦不勝其多楊

因言宗室之盛曰頃在漳州因壽康登極恩宗室重試出官一日之間出官者凡六十餘人州郡頓添許多俸給幾無以支吾朝廷不慮久遠宗室日盛爲州郡之患且如一人有十子使用十分孤遺請受有子孫多則寧不肯出官蓋出官則其子孫孤遺之俸皆止而一官之俸反不如孤遺衆分之多也在法宗室無依倚者方得請孤遺俸有依倚者不得請有依

倚謂其伯叔兄弟有官可以相依倚而不至於困乏。今則有伯叔兄弟爲官者。反得憑勢以請孤遺之俸。而真孤遺無依倚者。反艱於請。以其無援而州郡沮抑之也。不知當初立法如何。煞有不公處。如宗室丁憂。依舊請俸。宗室選人待闕。亦有俸給。恩亦太重矣。朝廷更不思久遠。他日爲州郡之害。未涯也。如漢法。宗室惟天子之子。則裂地而王之。其王之子。則嫡者一人繼王。庶子則皆封侯。侯惟嫡子繼侯。而其諸子。則皆無封。故數世之後。皆與庶人無異。其勢無以自給。則不免躬農畝之事。如光武少年自販米是也。

選舉

呂與叔欲奏立四科取士曰德行曰明經曰政事曰文學德行則待州縣舉薦下三科却許人投牒自試明經裏面分許多項目如春秋則兼通三傳禮則通三禮樂則盡通諸經所說樂處某看來樂處說也未盡政事則如試法律等及行移決判事又定爲試辟未試則以事授之一年看其如何辟則令所屬長官舉辟遠器云這也只是法曰固是法也待人而行然這却法意詳盡如今科舉直是法先不是了今來欲教吏部與二三郎官盡識得天下官之賢否定是了不得這事賀孫林擇之曰今士人所聚多處風俗便不好故太學不如州學州學不如縣學縣學不如鄉學曰太學真箇無益於國家教化

之意何在。向見陳魏公說亦以爲可罷。義剛

祖宗時科舉法疎濶。張乖崖守蜀。有士人亦不應舉。乖崖去尋得李旼出來舉送去。如士人要應舉時。只是着布衫麻鞋。陳狀稱百姓某人。今聞朝廷取士。如何如何來應舉。連投所業。太守略看所業。方請就客位。換襪幘。相見方得請試。只一二。人試訖。舉送。舊亦不糊名。仁宗時方糊名。揚

康節謂天下治則人上行。天下亂則人上文。太祖時人都不理會文。仁宗時人會說。今又不曾說。只是胡說。因見時文義甚。是使人傷心。揚

王介甫三經義。固非聖人意。然猶使學者知所統一。不過專念。

本經及看注解。而以其本注之說爲文辭主司考其工拙而定去留耳。豈若今之違經背義。恣爲奇說。而無所底止哉。當時神宗令介甫造三經義。意思本好。只是介甫之學不正。不足以發明聖意。爲可惜耳。今爲經義者。又不若爲詞賦。詞賦不過工於對偶。不敢如治經者之亂說也。聞虜中科舉罷。卽曉示云。後舉於某經某史命題。仰士子各習此業。使人心有所定止。專心看一經一史。不過數舉。則經史皆通。此法甚好。今爲主司者。務出隱僻題目。以乘人之所不知。使人弊精神於檢閱。茫然無所向方。是果何法也。倘

包顯道言科舉之弊。先生曰。如他經尚是就文義上說。最是春

秋不成說話。多是去求言外之意。說得不成模樣。某說道。此皆是侮聖人之言。却不如王介甫樣。索性廢了較強。又笑云。常有一人作隨時變通論。皆說要復古。至論科舉。要復鄉舉里選。却說須是歇二十年却行。要待那種子盡了。方行得。說得來也是。義剛

器遠問。今士人習爲時文應舉。如此須當有箇轉處否。曰。某舊時看天下如何有許多道理。如今看來。只有一箇道理。只有一箇學。在下者也着如此學。在上者也着如此學。在上若好學。自見道理。許多弊政。亦自見得。須要整頓。若上好學。便於學舍選舉賢儒。如胡安定。孫明復。這般人。爲教導之官。又須

將科目盡變了。全理會經學。這須會好。今未說士子。且看朝廷許多奏表。支離蔓衍。是說甚麼。如誥宰相。只須說數語戒諭。如此做足矣。敬之云。先生常說奏表之文。下諛其上也。誥敕之文。上諛其下也。賀孫

問今日科舉之弊。使有可爲之時。此法何如。曰。也廢他不得。然亦須有箇道理。又曰。更須兼他科目取人。

今科舉之弊極矣。鄉舉里選之法。是第一義。今不能行。只是就科舉法中與之區處。且變着如今經義格子。使天下士子各通五經大義。一舉試春秋。一舉試三禮。一舉試易詩書。禁懷挾。出題目。使寫出註疏與諸家之說。而斷以己意策論。則試

以時務。如禮樂兵刑之屬。如此亦不爲無益。欲革奔競之弊。則均諸州解額。稍損太學之額。太學則罷月書季考之法。皆限之以省試。獨取經明行脩之人。如此亦庶幾矣。本之

因說科舉所取文字。多是輕浮。不明白着實。因歎息云。最可憂者。不是說秀才做文字不好。這事大關世變。東晉之末。其文一切含糊。是非都沒理會。賀孫

有少年試教官。先生曰。公如何須要去試教官。如今最沒道理。是教人懷牒來試討教官。某嘗經歷諸州。教官都是許多小兒子。未生髭鬚。入學底多是老大底人。如何服得他。某思量須是立箇定制。非四十以上。不得任教官。又云。須是罷了堂

除及註授教官。却請本州鄉先生爲之。如福州便教林少穎。這般人做士子也。歸心他教也。必不苟。又曰。今教授之職。只教人做科舉時文。若科舉時文。他心心念念要爭功名。若不教他。你道他自做不做。何待設官置吏。費廩祿。教他做也。須是當職底人。怕道人。不曉義理。須是要教人識些。如今全然無此意。如何恁地。賀孫

坐中有說赴賢良科曰。向來作時文應舉。雖是角虛無實。然猶是白直。却不甚害事。今來最是喚做賢良者。其所作策論。更讀不得緣世上只有許多時事。已前一齊話了。自無可得說。如竿酒相似。第一番淋了。第二番又淋了。第三番又淋了。如

今只管又去許多糟粕裏淋有甚麼得話。既無可得話。又只管要新。最切害處。是輕德行。毀名節。崇智術。尚變詐。讀之使人痛心疾首。不知是甚。世變到這裏。可畏。可畏。這都是不祥之兆。隆興以來不恁地。自隆興以後。有恢復之說。都要來說功名。初不曾濟得此事。今看來。反把許多元氣都耗却。管子孔門所不道。而其言猶曰。禮義廉恥。是謂四維。如今將禮義廉恥。一切掃除了。却來說事功。賀孫

問學究一科沿革之故。曰。此科卽唐之明經是也。進士科則試文字。學究科但試墨義。有才思者。多去習進士科。有記性者。則應學究科。凡試一大經者。兼一小經。每段舉一句。令寫上。

下文以通不通爲去取。應者多是齊魯河朔間人。只務熟讀和注文也。記得故當時有董五經黃二傳之稱。但未必曉文義。正如和尚轉經相似。又有司待之之禮。亦不與進士等進士入試之日。主文則設案焚香。垂簾講拜。至學究則徹幕以防傳義。其法極嚴。有渴至飲硯水而黔其口者。當時傳以爲笑。歐公亦有詩云。焚香禮進士。徹幕待諸生。其取厭薄如此。荆公所以惡而罷之。但自此科一罷之後。人多不肯去讀書。

儒用

天生一世人才。自足一世之用。自古及今。只是這一般人。但是有聖賢之君在上。氣焰大薰蒸。陶冶得別。這箇自爭八九分。

只如時節雖不好。但上面意思略轉。下面便轉。況乎聖賢是甚力量。少間無狀底人。自銷鑠改變。不敢做出來。以其平日爲己之心。爲公家辦事。自然脩舉。蓋小人多是有才底。儒用荀悅曰。教化之行。挽中人而進于君子之域。教化之廢。推中人而墮於小人之塗。若是舉世恁地。各舉其職。有不能者。亦須勉強去做。不然也。怕公議既無。公議舉無忌憚了。夢孫

今日人材。須是得箇有見識。又有度量人。便容受得。今日人材。將來截長補短使。升卿

今世士大夫。惟以苟且逐旋挨去爲事。挨得過時。且過。上下相咻。以勿生事。不要十分分明理會。事且恁鶻突。才理會得分

明便做官不得有人少負能聲及少經挫抑却悔其太惺惺
了一切利方爲圓且恁隨俗苟且自道是年高見識長進當
官者上下大小以不見吏民不治事爲得策曲直在前只不
理會庶幾民自不來以此爲止訟之道民有冤抑無處伸訴
只得忍過便有訟者半年周歲不見消息不得了決民亦只
得休和居官者遂以爲無訟之可聽風俗如此可畏可畏
今日人才之壞皆由於詆排道學治道必本於正心脩身實見
得恁地然後從這裏做出如今士大夫但說據我逐時恁地
做也做得事業說道學說正心脩身都是閒說話我自不消
得用此若是一人叉手並脚便道是矯激便道是邀名便道

是做崖岸須是如市井底人拖泥帶水方始是通儒實才

官制

周不置三公之官只是冢宰以下六卿爲之周公嘗以冢宰爲太師顧命乃同召太保奭芮伯彤伯畢公衛侯毛公注謂此六卿也稱公則三公矣

揚

或問漢三公之官與周制不同何耶曰漢初未見孔壁古文尚

書中周官一篇說太師太傅太保爲三公

或錄云自古文尚書出方有周官篇

伏生口授二十五篇無周官故漢只置大尉司徒司空爲三公而無周三公三少蓋未見古文尚書但見伏生

口授牧誓立政篇中所說司徒司馬司空遂誤以是爲三公

而置之

愚按漢高后元年初置少傅平帝元始元年又置太保太師然當時所建三公實司徒司馬司空非此之

謂但因其字義以爲師保之職故亦甚尊崇之位在三公上東漢稱爲上公後世易爲三師皆是意也使西漢明見周官有所據依必不若是外矣又按漢書百官表中却曰太師太傅太保是爲三公又曰或說司馬主天司徒主人司空主土是爲三公其說與周官合者豈孔氏書所謂傳之子孫以貽後代者至是私有所傳授故班固得以述之歟抑但習聞其說無所折衷故兩存之而不廢耶古文尚書至東晉時因內史梅願始行于世東晉之前如楊雄以酒誥爲虛談趙岐杜預以說命臯陶謨等篇爲逸書則其證也古者諸侯之國只得置司徒司馬司空

三卿爲天子方得置三公三孤六卿牧誓立政所紀周是時方爲諸侯乃侯國制度周官所紀則在成王時所以不同三公三孤以師道輔佐天子本是加官周公以太師兼冢宰召公以太保兼宗伯是以加官而兼宰相之職也後世官職益繁今遂以三公三孤之官爲階官貼職之類不復有師保之

任論道經邦之責矣。舊來猶是文臣之有勲德重望者方除。以其有輔教天子之名故也。後世或以諸王。或以武臣爲之。既是天子之子與武臣。豈可任師保之責耶。儒用

或問僕射名義如何。曰舊云秦時置僕射。專主射。恐不然。禮云。

僕人師扶左。射人師扶右。

卽周官太僕之職

君薨以是舉僕射之名。

蓋起於此。以其朝夕親近人主。後世承誤輒失其真。遂以爲

宰相之號。如侍中中書令尚書令亦是如此。侍中秦官。漢因

之多是侍衛人主。

或錄云或執唾壺虎子之屬行幸則從其初職甚微

行則參錯於宦

官之間。其初猶以儒者爲之。如武帝時孔安國爲侍中。嘗掌

唾壺是也。以其日與人主相親故寢以用事。尚書是掌羣臣

書奏如州郡開拆司管進呈文字凡四方章奏皆由之以達其初亦甚微只如尚衣尚食尚輦尚藥之類亦緣居中用事所以權日重中書因漢武帝游宴後庭去外庭遠始用宦者典事謂之中書謁者置令僕射尤與人主親狎故其權愈重元帝時弘恭爲令石顯爲僕射嘗權傾內外按蕭望之云中書政本宜用士人蓋自武帝始用宦官出入奏事非舊制也及光武卽位政事不任三公而盡歸臺閣或錄云臺卽尚書閣卽禁中也三公皆擁虛器凡天下事盡入於中書嘗見後漢羣臣章奏首云臣某奏疏上書猶今言殿下陛下之類雖是不敢指斥而言亦足以見其居要地而秉重權矣當時事無巨細皆是尚書行下三公或不經由三公徑下九

卿。或錄云三公之權反不如九卿所以漢世宦者弄權用事故東漢時不惟尚書之權而

九卿之權亦重者此也。按光武不任三公事歸臺閣者蓋當時謂六尚書為臺猶今言尚書省也

曹操開魏王府未敢即擬朝廷建官。或錄云置中書但置秘書令。或錄

作監。漢之後始改為中書監以其素承寵任故荀勗自中書

遷尚書監人賀之勗曰奪我鳳凰池諸君何賀耶。或錄云蓋

如中書之居中用事親密也問侍中是時為何官曰黃門監即今之門下省左右散騎常侍皆黃門監之屬也西漢

時中書之權重東漢時尚書之權重至此則中書之權復重

而尚書之權漸輕矣問省字何義曰省即禁也舊謂之禁避

漢元后父諱遂改為省。儒用或錄少異

古者人主左右攜提執賤役若虎賁綴衣之類皆是士大夫日

相親密。所謂侍御僕從。罔匪正人。以旦夕承弼厥辟。出入起居。罔有不欽。發號施令。罔有不臧。不似而今。太隔絕人主。極尊嚴。真如神明。人臣極卑屈。望拜庭下。不交一語。而退。漢世禁中侍衛。亦是士大夫。以孔安國大儒而執唾壺。雖儀盆亦是士人執之。宋文帝時。大臣劉湛入見。則與坐語。初聞愛之。視日影之斜。惟恐其去。後來厭之。視日景之斜。惟恐其不去。後竟殺之。魏明帝初說大臣太重。則國危。小臣太親。則身蔽。當時於大臣已爲之處置。後來左右小臣親密。至使中書令某人上床執手。強草遺詔。流弊便有此事。漢宣懲霍光之弊。事必躬親。又有宦者恭顯出來。光武懲王莽之弊。不任三公。

事歸臺閣尚書御史大夫謁者謂之三臺義剛

昔周公立許多官制都有統攝連屬自秦漢而下皆是因一事

立一官便無些統攝連屬了熹

唐之兵盡付與刺史節度使其他牙將之類皆由刺史節度使

辟置無如今許多官屬廣

或問東宮官屬曰唐六典載東宮官制甚詳如一小朝廷置詹事以統衆務則猶朝廷之尚書省也置左右二春坊以領衆局則猶中書門下省也左右春坊又皆設官有各率其屬之意崇文館猶朝廷之館閣贊善大夫猶朝廷之諫議大夫其官職一視朝廷而爲之降殺此等制度猶好今之東宮官屬

極苟簡左右春坊舊制皆用賢德者爲之今遂用武弁之小
有才者其次惟有講讀數員而已如贊善大夫諸官又但爲
階官非實有職業神宗以唐六典改官制乃有疎略處如東
宮官屬之不備是也其舊嘗入一劄子論東宮官制疎略宜
放舊損益之不報又曰唐之官制亦大率因隋之舊府衛租
庸調之法皆是也當時大亂殺傷之後幾無人類所以宇文
泰與蘇綽能如此經營三代而下制度稍可觀者唯宇文氏
耳蘇綽一代之奇才今那得一人如此儒用

唐六典明皇時所撰雖有是書然其建官却不依此其書却是
齊整然其說一切繁冗迂曲神宗喜之一一依此定官制神

宗本欲富強其後因此皆迂曲緩弱了。左僕射行事右丞相取旨溫公元祐間甚苦之。入文字要改祖宗官制雖名不齊整然其實徑直紹興間以其不便方改之。二相之權均矣。揚

方今朝廷只消置一相二參政兼六曹

如吏兼禮戶兼工兵兼刑

樞密可能

如此則事易達又如宰相擇長官長官却擇其寮今銓曹注擬小官繁劇而又不能擇賢每道只令監司差除亦好每道仍只用一監司人傑因舉陸宣公之言以爲豈有臺閣長官則不能擇一二屬吏爲宰相則可擇千百具寮曰此說極是當時如沈既濟亦有此說之意。人傑

古者王畿千里而已然官屬已各令其長推擇令天下之大百

官之衆皆總於吏部下至宰執幹辦使臣特其家私僕爾亦須吏部差注所以只是衰衰地鶻突差將去何暇論其人之材否今朝廷舉事三省下之六部六部下之監寺監寺却申上六部六部又備申三省三省又依所申行下只祠祭差官其人不過在朝職事官其姓名亦豈難記然省中必下之禮部禮部行下太常太常方擬定申部部申省省方從其所申差官不知何用如此迂曲只三省事亦然尚書關中書取旨中書送門下審覆門下送尚書施行又如既有六部卽無用九卿周家只以六卿分職漢人只以九卿釐庶務事各歸一本朝建官重三疊四多少勞擾此須大有爲後痛更革之若

但宰相有志亦不能辦必得剛健大有爲之君自要做時方可書曰亶聰明作元后元后作民父母須是剛明智勇出人意表之君方能立天下之事又如今諸路兵將官有總管路分路鈐都監監押正將副將都不曾管一事廂軍旣無用又養禁軍禁軍又分揀中不揀中兩等然亦無用又別養大軍今大軍亦漸如廂禁軍矣此是耗蠹多少通其變使民不倦今變而不通民皆倦了故鼓舞不動國初緣藩鎮强故收其兵權置通判官今已無前日可防之弊却依舊守此法可謂不知變也只通判是要何用繆者事事不管只任知州自爲疆者又必妄作以撓郡政是何益哉必大

自秦置守尉監漢有郡守刺史如今監司專主按察至漢末令

刺史掌兵遂侵郡守之權兼治民事而刺史之權獨重後來

或置或否

漢有十二州百三郡郡有太守州有刺史歷代添置州名愈多而郡愈少又其後也遂去郡而爲州

故刺史兼治軍民而守廢至隋又置郡守某嘗說不用許多

後又廢守置刺史而刺史遂爲太守之職

監司每路只置一人復刺史之職正其名曰按察使令舉刺

州縣官吏其下却置判官數員以佐之如轉運判官刑獄判

官農田判官之類農田專主婚田轉運專主財賦刑獄專主

盜賊刑獄而刺史總之稍重諸判官之權資序視通判而刺

史視太守判官有事欲奏聞則刺史爲之發奏刺史不肯發

則許判官自徑申御史臺尚書省以分刺史之權蓋刺史之

權獨專則又不便。若其人昏濁則害貽一路。百姓無出氣處。故又須略重判官之權。諸判官下。却置數員屬官。如職幕官之類。如此則重權歸一。太守自治州事。而刺史則舉刺一路。豈不簡徑省事。而無煩擾耗蠹之弊乎。問今之主管資格。亦視通判曰然。但權輕不能有所爲。只得奉承運使而已。若分爲判官。俾得專達。則其權重而監司亦不敢妄作矣。個

朝廷只當擇監司太守。自餘職幕縣官。容他各辟所知。方可責成。天下須是放開。做使恹恹有餘地。乃可。浩

因論薦舉之弊。曰。亦不難革。只是擇諸路監司。併得一好吏部尚書。揀薦得不是人材者退去。便須得人。今胡亂薦來。但不

犯賊罪便得。若犯了賊。不過降得兩官。安得不胡薦。然則

兵制官制田制。便考得三代西漢分明。然與今日事勢名實。皆用不得。如官制不若。且就今日之官。罷其冗員。存其當存者。亦自善。必大

某嘗謂宰相是舜禹伊周差遣。下此亦須房杜姚宋之徒。方能處置得天下事後之當此任者。怪他不能當天下之事。不得。是他人品只如此。力量有所不足。如何強得。振

國子司業學官尚可爲天下人材所聚。庶幾有可講學成就者。然今日爲之。明日便當改作。使士人母以利爲心。若君無尊德樂道之誠。必不能用。方

其嘗謂今做監司不如做州郡。做州郡不如做一邑。事體却由自家。監司雖大於州。州雖大於邑。然多被下面做翻了。上面如何整頓。道夫

前輩說話可法。某嘗見吳公路云。他作縣不敢作旬假。一日假則積下一日事。到底自家用做。轉添得繁劇。則多粗率。不子細。豈不害事。道夫

賦役

今欲行古制。欲法三代。煞隔霄壤。今說爲民減放。幾時放得到他元肌膚處。且如轉運使。每年發十萬貫。若大段輕減。減至五萬貫。可謂大恩。然未減放那五萬貫。尚是無名額外錢。須

一切從民正賦凡所增名色一齊除盡民方始得脫淨這裏
方可以議行古制如今民生日困頭只管重更起不得爲人
君爲人臣又不以爲急又不相知如何得好這須是上之人
一切掃除妄費卧薪嘗膽合天下之智力日夜圖求一起而
更新之方始得某在行在不久若在彼稍久須更見得事體
可畏處不知名園麗圃其費幾何日費幾何下面頭會筭歛
以供上之求又有上不在天子下不在民只在中間白乾消
沒者何限

賀孫

程正思言當今守令取民之弊渠能言其弊畢竟無策就使臺
官果用其言而陳於上前雖戒敕州縣不過虛文而已先生

云。今天下事只礙箇失人情。便都使不得。蓋事理只有一條。是非。今朝廷之上不敢辨別是非。如宰相固不欲逆上意。上亦不欲忤宰相意。今聚天下之不敢言是非者在朝廷。又擇其不敢言之甚者爲臺諫。習以成風。如何做得事。人傑

今上下匱乏。勢須先正經界。賦入旣正。總見數目。量入爲出。罷去冗費。而悉除無名之賦。方能救百姓於湯火中。若不認百姓是自家百姓。便不恤。必大

荀悅云。田制須是大亂之後方可定。楊

黃仁卿將宰樂安。論及均稅錢。曰。今說道稅不出鄉。要之稅有輕重。如何不出鄉得。若教稅不出鄉時。庶稅均稍得。先生曰。

稅不出鄉。只是古人一時間尋得這說去防那一時之弊。而今耳裏聞得。却把做箇大說話。但只均稅錢也未盡。須是更均稅物方得。且如福州納稅一錢。可以當這裏十錢。而今便須是更均那稅物。又曰。往在漳州見有退稅者。不是一發退了。謂如春退了稅。後秋又要退苗。却不知別郡如何。然畢竟是名目多。後恁地據某說時。只教有田底便納米。有地底便納絹。只作兩鈔。官司亦只作一倉一場。如此百姓與官司皆無許多勞攘。又曰。三十年一番經界方好。又曰。元稹均田圖。惜乎不見。今將他傳來考。只有兩疏。却無那圖。然周世宗一見而喜之。便欲行。想見那圖大段好。嘗見陸宣公奏議後面。

說那口分世業其纖悉畢盡古人直是恁地用心今人若見均田圖時他只把作鄉司職事看了定是不把作書讀今如何得有陸宣公樣秀才又曰林勲本政書每鄉開具若干字號田田下註人姓名是以田爲母人爲子說得甚好義剛

因論役法曰差役法善晁以道嘗有劄子論差役有十利個

彭仲剛子復作台州臨海縣理會役法甚善朝廷措置役法看如何措置終是不公且如鄉有寬狹寬鄉富家多狹鄉富家少狹鄉富家僅僅自足一被應役無不破家蕩產極可憐憫彭計一縣有幾鄉鄉有濶狹某鄉多富家某鄉少富家却中分富家以昇兩鄉令其均平其有不均處則隨其道里遠近

分割裨補令其恰好人甚便之或曰恐致人怨曰不怨蓋其公心素有以信於民民自樂之雖非法令之所得爲然使民宜之亦終不得而變也個

因論保伍法或曰此誠急務曰固是先王比閭保伍之法便是此法都是從這裏做起所謂分數是也兵書云御衆有多寡分數是也看是統馭幾人只是分數明所以不亂王介甫銳意欲行保伍法以消天下坐食之兵不曾做得成范仲達名爲袁州萬載令行得保伍極好自來言保伍法無及之者如此人有心力行得極整肅雖有奸細更無所容每有疑以無行止人保伍不敢著互相傳送至縣縣驗其無他方令傳送

出境訖任滿無一寇盜項張定叟知袁州託其訊問則其法已亡偶有一縣吏略記大槩間

今朝廷之財賦不歸一分成兩三項所以財匱且如諸路總領
贍軍錢凡諸路財賦之入總領者戶部不得而預也其他則
歸戶部戶部又未盡得凡天下之好名色錢容易取者多者
皆歸於內藏庫封樁庫惟留得名色極不好極難取者乃歸
戶部故戶部所得者皆是枷棒拷箠得來所以戶部愈見匱
乏封樁內藏孝宗時銳意恢復故愛惜此錢不肯妄用間欲
支則有司執奏旋悟而止及至今日則供浮費不復有矣今
之戶部內藏正如漢之大農少府錢大農則國家經常之費

少府則人主之私錢

因致道說國家財用耗闕某人曾記得在朝文臣每月共支幾萬貫武臣內侍等五六十萬貫曰唐初節度使皆是臨陳對敵平定禍亂故得此官今因唐舊而節度使之名不罷皆安居暇食安然受節度使之重祿豈不是無謂似聞蔡京當國會欲罷之賀孫

軍政

問選擇將帥之術曰當無事之時欲識得將須是具大眼力如蕭何識韓信方得不然邊警之時兩兵相抗恁時人才自急且如國家中興張韓劉岳突然而出豈平時諸公所嘗識者

不過事期到此，廝撥出來耳。

道大

不令宦官賣統軍官職，是今日軍政第一義。

方

或問諸公論置二大帥以統諸路之帥如何？曰：不消如此。只是擇得一箇人了。君相便專意委任他，却使之自擇參佐，事便歸一。今若更置大帥以監臨之，少間必有不相下之意，徒然紛擾。須是得一箇人委任他，聽他自漸漸理會。許多軍政將來自有序理。

格

今州郡無兵無權，先王之制，內有六卿六遂都鄙之兵，外有方伯連帥之兵，內外相維，緩急相制。

賀孫

或言古人之兵當如子弟之衛父兄，而孫吳之徒必曰與士卒

同其苦而後可。是子弟必待父兄施恩而後報也。先生曰：巡而拊之，三軍之士皆如挾纊，此意也。少不得。賀孫

今日兵不濟事，兵官不得人，專務刻削兵，且驕弱。安養不知勞苦，一旦如何用？某嘗言：宜散京師之兵，却練諸郡之兵，依太祖法。每年更戍，趙去淮上衛邊，謂如福建之兵，趙去饒州，饒州之兵，趙去衢信，衢信趙去，行在迤邐，趙去淮上。今年如此，明年又趙去，則京師全無養兵之費，豈不大好。與心

言今兵政之弊曰：唐制節度

兵

觀察

財

處置等使，卽節鎮也使。

持節某州諸軍事

兵

某州刺史

民

卽支郡也。支郡隸於節鎮。

而節鎮支郡各有衙前、左右押衙、管軍都頭、並掌兵事，又皆

是士人爲之其久則根勢深固反視節度有客主之勢至有
誅逐其上而更代爲之凡陸梁跋扈之事因茲而有惟是節
度得人方能率服人心歸命朝廷若論唐初兵力最盛斥地
最廣乃在於統兵者簡約而無牽制之患然自唐末大抵節
鎮之患深如人之病外強中乾其勢必有以通其變而後可
故太祖皇帝知其病而疏理之於是削其支郡以斷其臂指
之勢當時至有某州某縣直隸京師而不屬節度者置通判以奪其政命都監監押
以奪其兵立倉場庫務之官以奪其財向之所患今皆無憂
矣其後又有路分鈐轄總管等員神宗時又增置三十七將
亂離之後又有都統統領統制之名大抵今日之患又却在

於主兵之員多朝廷雖知其無用姑存其名日費國家之財不可勝計又刻剝士卒使士卒困然於下若更不變而通之則其害未艾也要之此事但可責之郡守他分明謂之郡將若使之練習士卒脩治器甲築固城壘以爲一方之守豈不隱然有備而可畏古人謂生之者衆食之者寡爲之者疾用之者舒今一切反之

道夫

兵中詭名不可免善兵者亦不於此理會纔有一人可用便令其兼數人之料軍中若無此便不足以使人故朝廷只是擇將以其全數錢米與之只責其成功不來此屑屑計較近來刮剝得都盡朝廷方以爲覈實得好

楊

兵法以能分合爲變。不獨一陣之間有分合。天下之兵皆然。今日之兵。分者便不可合。合者便不可分。本朝舊來只郡國禁兵而已。但在西北者差精銳耳。渡江後又添上御前軍。却是張韓輩自起此項兵。後來旣不可得而去。只得如此聚屯。今以不如祖宗時財賦。養祖宗時所無之兵。安得不窮也。營

財用不足。皆起於養兵。十分八分是養兵。其他用度止在二分之中。古者剝剝之法。本朝皆備。所以有靖康之亂。已前未有池揚江鄂之兵。止謂張宣撫兵。其人兵今增添許多兵。合當精練禁兵。汰其老弱以爲廂兵。節

今日民困。正緣松江屯兵費重。只有屯田可減民力。見說襄漢

間儘有荒地某云當用其人耕墾曰兵民兼用各自爲屯彼地沃衍收穀必多若做得成敵人亦不敢窺伺兵民得利既多且耕且戰便是金城湯池兵食旣足可省漕運民力自蘇然後盡驅州郡所養歸明北軍往彼就食則州郡自寬遲之十年其效必著須是擇帥旣得其人專一委任許令辟召寮屬同心措置勿數更易庶幾有濟

浩

屯田須是分而屯之統帥屯甚州總司屯甚州漕司屯甚州以戶部尚書爲屯田使使各考其所屯之多少以爲殿最則無不可行者今則不然每欲行一文字則經由數司僉押相牽制事何由成

道夫

刑法

天下事最大而不可輕者，無過於兵刑。臨陣時是胡亂錯殺了幾人，所以老子云：夫佳兵者，不祥之器。聖人不得已而用之，獄訟面前分曉事易看，其情偽難通，或旁無佐證，各執兩說，繫人性命處，須喫緊思量，猶恐有誤也。問

今人說輕刑者，只見所犯之人爲可憫，而不知被傷之人尤可念也。如刼盜殺人者，人多爲之求生，殊不念死者之爲無辜，是知爲盜賊計而不爲良民地也。若如酒稅偽會子及饑荒竊盜之類，猶可以情原其輕重大小而處之。時舉

朱子卷八

後學西山張能鱗纂輯

天道類

文集

太極說

動靜無端陰陽無始天道也始於陽成於陰本於靜流於動者人道也然陽復本於陰靜復根於動其動靜亦無端其陰陽亦無始則人蓋未始離乎天而天亦未始離乎人也

元亨誠之通動也利貞誠之復靜也元者動之端也本乎靜貞者靜之質也著乎動一動一靜循環無窮而貞也者萬物之所

以成終而成始者也。故人雖不能不動而立人極者，必主乎靜。惟主乎靜，則其著乎動也，無不中節而不失其本然之靜矣。靜者性之所以立也，動者命之所以行也。然其實則靜亦動之息耳。故一動一靜，皆命之行而行乎動靜者，乃性之真也。故曰天命之謂性。

情之未發者，性也。是乃所謂中也。天下之大本也。性之已發者，情也。其皆中節，則所謂和也。天下之達道也。皆天理之自然也。妙性情之德者，心也。所以致中和立大本而行達道者也。天理之主宰也。

靜而無不該者，性之所以爲中也。寂然不動者也。動而無不中

者情之發而得其正也。感而遂通者也。靜而常覺動而常止者。心之妙也。寂而感感而寂者也。

楚辭註

論天地日月星辰之位

左傳曰：日月所會，是謂辰位。注云：一歲日月十二會，所會爲辰。十一月辰在星紀，十二月辰在元枵之類是也。然此特在天之位。若以地而言之，則南面而立，其前後左右亦有四方十二辰之位焉。但在地之位一定不易，而在天之象運轉不停。惟天之鶉火加於地之午位，乃與地合而得天運之正耳。蓋周天三百六十五度四分度之一，周布二十八宿以著天體而定四方之位，以天繞地則一晝一夜適周一匝而又超一度。日月五星亦

隨天以繞地而唯日之行一日一周無餘無欠其餘則各有遲速之差焉然其懸也固非綴屬而居其運也亦非推輓而行但當其氣之盛處精神光耀自然發越而又各有次第耳列子曰天積氣耳日月星辰亦積氣中之有光耀者張衡靈憲曰星也者體生於地精成於天列居錯峙各有攸屬此言皆得之矣

又楚辭註

論天形地氣之說

天之形圓如彈丸朝夕運轉其南北兩端後高前下乃其樞紐不動之處其運轉者亦無形質但如勁風之旋當晝則自左旋而向右向夕則自前降而之後當夜則自右轉而復左將旦則自後升而趨前旋轉無窮升降不息是爲天體地則氣之查滓

聚成形質者。但以其來於勁風旋轉之中。故得以兀然浮空。甚久而不墜耳。黃帝問岐伯曰。地有憑乎。岐伯曰。大氣舉之。亦謂此也。

答陸子美

論太極西銘

伏承示諭太極西銘之失。備悉指意。然二書之說。從前不敢輕議。非是從人脚根。依他門戶。却是反覆看來。道理實是如此。別未有開口處。所以信之不疑。而妄以已見輒爲之說。正恐未能盡發其奧。而反以累之。豈敢自謂有扶掖之功哉。今詳來教。及省從前所論。却恐長者從初便忽其言。不曾致思。只以自家所見道理爲是。不知却元來未到他地位。而便以已見輕肆抵排。

也。今亦不暇細論。只如太極篇首一句。最是長者所深排。然殊不知不言無極。則太極同於一物。而不足爲萬化之根柢。不言太極。則無極淪於空寂。而不能爲萬化之根本。只此一句。便見其下語精密。微妙無窮。而向下所說許多道理。條貫脉絡。井井不亂。只今便在目前。而亘古亘今。顛撲不破。只恐自家未曾見得如此分明直截。則其所可疑者。乃在此而不在彼也。至於西銘之說。猶更分明。今亦且以首句論之。人之一身。固是父母所生。然父母之所以爲父母者。卽是乾坤。若以父母而言。則一物各一父母。若以乾坤而言。則萬物同一父母矣。萬物旣同一父母。則吾體之所以爲體者。豈非天地之塞。吾性之所以爲性者。

豈非天地之帥哉。古之君子。惟其見得道理真實如此。所以親親而仁民。仁民而愛物。推其所爲。以至於能以天下爲一家。中國爲一人。而非意之也。今若必謂人物只是父母所生。更與乾坤都無干涉。其所以有取於西銘者。但取其姑爲宏濶廣大之言。以形容仁體。而破有我之私而已。則是所謂仁體者。全是虛名。初無實體。而小己之私。却是實理。合有分別。聖賢於此。却初不見義理。只見利害。而妄以己意造作言語。以增飾其所無。破壞其所有也。若果如此。則其立言之失。膠固二字。豈足以盡之。而又何足以破人之桎於一己之私哉。大抵古之聖賢。千言萬語。只是要人明得此理。此理旣明。則不務立論。而所言無非義。

理之言不務正行而所行無非義理之實無有初無此理而姑爲此言以救時俗之弊者不知子靜相會曾以此話仔細商量否近見其所論王通續經之說似亦未免此病也如有未當切幸痛與指摘剖析見教理到之言不得不服也

答楊子直

論太極持敬

承論太極之說足見用力之勤深所歎仰然鄙意多所未安今且略論其一二大者而其曲折則托季通言之蓋天地之間只有動靜兩端循環不已更無餘事此之謂易而其動其靜則必有所以動靜之理焉是則所謂太極者也聖人既指其實而名之周子又爲之圖以象之其所以發明表著可謂無餘蘊矣原

極之所以得名蓋樞機之義聖人謂之太極者所以指夫天地萬物之根也周子因之而又謂之無極者所以著夫無聲無臭之妙也然曰無極而太極太極本無極則非無極之後別生太極而太極之上先有無極也又曰五行陰陽陰陽太極則非太極之後別生二五而二五之上先有太極也以及至於成男成女化生萬物而無極之妙蓋未始不在是焉此一圖之綱領大易之遺意與老子所謂物生於有有生於無而以造化爲真有始終者正南北矣來喻乃欲一之所以於此圖之說多所乖礙而不得其理也某向云太極爲體動靜爲用其言固有病後已改之曰太極者本然之妙也動靜者所乘之機也此則庶幾近之

來喻疑於體用之云甚當。但所以疑之之說則與某之所以改

之之意。又若不相似然。蓋謂太極含動靜則可。以本體而言。謂太極

有動靜則可。以流動而言。若謂太極便是動靜。則是形而上下者不

可分。而易有太極之言亦贅矣。其他則季通論之已極精詳。且

當就此虚心求之。久當自明。不可別生疑慮。徒自繳繞也。持敬

之說不必多言。但熟味整齊嚴肅。嚴威儼恪。動容貌。整思慮。正

衣冠。尊瞻視。此等數語。而實加功焉。而所謂直內。所謂主一。自

然不費安排。而身心肅然。表裏如一矣。豈陸棠之謂哉。彼其挾

詐欺人。是乃敬之賊耳。今反以敬之名歸之。而謂敬之實真有

不足行者。豈不誤甚矣哉。大抵身心內外。初無間隔。所謂心者。

固主乎內而凡視聽言動出處語默之見於外者亦卽此心之用而未嘗離也。今於其空虛不用之處則操而存之於其流行運用之實則棄而不省此於心之全體雖得其半而失其半矣。然其所得之半又必待有所安排布置然後能存故存則有攣苗助長之患否則有舍而不芸之失是則其所得之半又將不足以自存而失之孰若一主於敬而此心卓然內外動靜之間無一毫之隙一息之停哉。

答陳安卿

論天日夜行度之數

安卿問天道左旋自東而西日月右行之說故答之

橫渠說日月皆是左旋蓋天行甚健一週一夜周天三百六十

五度四分度之一。又過一度。日行速。健次於天。一日一夜周三百六十五度四分度之一。正恰好。彼天進一度。則日却成退減。一度。二日天進二度。則却成退了二度。積至三百六十五日。四分日之一。則天所進過之度。又却周得本數。而日所退之度。亦恰退盡。本數遂與天會而成一年。月行遲。一日一夜三百六十五度四分度之一。行不盡。比之天。却成退了十二度有奇。進數爲順天而左。退數爲逆天而右。曆家以進數難算。只以退數算之。故謂之右行。且曰日行遲。月行速也。然則日行却得其正。楊子太玄首便說日云云。向來久不曉此。因看月令。日窮於次。疏中有天行過一度之說。推之。乃知其然。又如書齊七政疏中二

三百字說得天之大體亦好。前漢曆志說道理處多不及東漢志較詳。又問月令疏地冬上騰夏下降。是否。曰未便理會到此。且看大綱識得後。此更用度算方知。

答董叔重

論天健不息之義

此說唯胡安定說得好。因舉其說曰。天者乾之形。乾者天之用。天形蒼然。南樞入地下三十六度。北樞出地上三十六度。狀如倚杵。其用則一晝一夜行九十餘萬里。人一呼一吸爲一息。一息之間。天已行八千餘里。人一晝一夜有萬三千六百餘息。故天行九十餘萬里。天之行健可知。故君子法之以自強不息云。

答胡用之

論天地形質理氣之說

夫乾其靜也專。其動也直。是以大生焉。夫坤其靜也翕。其動也闢。是以廣生焉。本義云。乾一而實。故以質言。而曰大。坤二而虛。故以量言。而曰廣。學者不曉。請問曰。此兩句解得極分曉。蓋曰。以形言之。則天包地外。地在天中。所以說天之質大。以理與氣言之。則地却包着天。天之氣却盡在地之中。地盡承受得那天之氣。所以說地之量廣大。只是一箇物事。一故實。從裏面便實出來。流行發生。只是一箇物事。所以說乾一而實。地雖是堅然。却虛。所以天之氣流行乎地之中。皆從地裏發出來。所以說坤二而虛。用之云。地形如肺形。質雖硬。而中本虛。故陽氣升降乎其中。無所障礙。雖金石也。透過去。地便承受得這氣。發育萬物。

曰然。要之天形如一箇鼓鞴。天便是那鼓鞴外面皮殼子。中間包得許多氣。開闔消長。所以說乾一而實。地只是箇物事。中間盡是這氣升降往來。緣中間虛。故容得這氣升降來往。以其包得地。所以說其質之大。以其容得天之氣。所以說其量之廣。非是說地之形有盡。故以量言也。只是說地盡容得天之氣。所以說其量之廣。爾今治曆家用律呂候氣。其法最精。氣之至也。分寸不差。便是這氣都在地中透上來。如十一月冬至。黃鍾管距地九寸。以葭灰實其中。至之日。氣至灰去。晷刻不差。又云。天地中間。此氣升降。上下當分爲六層。十一月冬至。自下面第一層生起。直到第六層上極至天。是爲四月。陽氣旣生足。便消。下面

陰氣便生只是這一氣升降循環不已往來乎六層之中也問
月令中天氣下降地氣上騰此又似是天地各有氣相交否曰
只是這一氣只是陽極則消而陰生陰極則消而陽生故云天
氣下降便只是冬至復卦之時陽氣在下面而生起故云地氣
上騰或曰據此則却是陰消於上而陽生於下却見不得天氣
下降曰也須是天運轉則陽氣在下故從下生也今以天運言
之則一日自轉一匝然又有那大轉底時候須是大着心腸看
始得不可拘一不通也蓋天本是箇大底物事以偏滯求他不
得

又答胡用之

論天文地理之說

或問周禮以土圭之法測土深正日景以求地中。日南則景短多暑。日北則景長多寒。日東則景夕多風。日西則景朝多陰。鄭注云。日南謂立表處太南。近日也。日北謂立表處太北。遠日也。景夕謂日映景乃中。立表處太東。近日也。景朝謂日未中而景已中。立表處太西。遠日也。曰景夕多風。景朝多陰。此二句鄭注不可非。但說倒了。看來景夕者。景晚也。謂日未中而景已中。蓋立表近南。則取日近。午前景短。而午後景長也。景朝者。謂日已過午而景猶未中。蓋立表太北。而取日遠。午前長。而午後短也。問多風多陰之說。曰。今近東之地。自是多風。如海邊諸郡。極多風。每如期而至。如春必東風。夏必南風。不如此間之無定。蓋土

地曠濶。無高山之限。故風各以其方至。某舊在漳泉。驗之。早間則風已生。至午而盛。至午後則風力漸微。至晚則更無一點風色。未嘗少差。蓋風隨陽氣生。日方升則陽氣生。至午則陽氣盛。午後則陽氣微。故風亦從而盛衰。如西北邊多陰。非特山高障蔽之故。自是陽氣到彼處衰謝。蓋日到彼方午。則彼已甚晚。不久卽落。故西邊不甚見日。古語云。蜀之日。越之雪。言見日少也。所以蜀有漏天。古語云。巫峽多漏天。老杜云。鼓角漏天東。言其地多雨。如天漏然。以此觀之。天地亦不甚濶。以日月所照。及寒暑風陰。觀之。可以驗矣。用之問天竺國去處。又却極濶。日以崑崙山言之。天竺直崑崙之正南。所以土地濶。而所生亦多異人。

水經云崑崙去嵩山五萬里。看來未嘗如此遠。蓋中國至于闐
二萬里。于闐去崑崙無緣更有三萬里。文昌雜錄記于闐遣使
來貢獻。使者自言其國之西千三百餘里。卽崑崙山。今中國在
崑崙之東南。而天竺諸國在其正南。水經又云黃河自崑崙東
北流入中國。如此則崑崙當在西南上。或又云西北不知如何。
恐河流曲折多。入中國後方見其東北流爾。佛經所說阿耨山
者卽崑崙也。云山頂有阿耨大池。水分流四面去。爲四大水。入
中國者黃河入東海。其三面各入南西北海。如弱水黑水之類。
大抵地之形如饅頭。其撚尖則崑崙也。問佛家天地四洲之說
果有之否。曰佛經有之。中國爲南禪部州。天竺諸國皆在南禪

部州內東弗於逮西瞿耶尼北鬱單越亦如鄒衍所說赤縣之類四州統名娑婆世界如是世界凡有幾所而娑婆世界獨居其中其形正圓故所生人物亦獨圓正象其地形蓋得天地之中氣其他世界則形皆偏側尖缺而環處娑婆世界之外不得天地之正氣故所生人物亦多不正此說便是蓋天之說橫渠亦主蓋天不知如何但其言日初生時先照娑婆世界故其氣和其他世界則日之所照或正或曷故氣不和只他此說便自可破彼言日之所照必經歷諸世界了然後入地則一日之中須歷照四處方得周匝今纔照得娑婆一處卽已曠黑若更照其他三處經多少時節如此則夜須極長何故今中國晝夜有

均停時而冬夏漏刻長短相去亦不甚遠其說於是不通矣

答虞士朋 論天地以生物爲心

復見天地心之說某則以爲天地以生物爲心者也雖氣有闔
闢物有盈虛而天地之心則亘古亘今未始有毫釐之間斷也
故陽極於外而復生於內聖人以爲於此可以見天地之心焉
蓋其復者氣也其所以復者則有自來矣向是天地之心生生
不息則陽之極也一絕而不復續矣尚何以復生於內而爲闔
闢之無窮乎此則所論動之端者乃一陽之所以動非徒指夫
一陽之已動者而爲言也夜氣固未可謂之天地心然正是氣
之復處苟求其故則亦可以見天地之心矣

答廖子晦

論日月所行之道

問曰：天有黃赤二道。沈存中云：非天實有之。特曆家設色以記日月之行耳。夫日之所由，謂之黃道。史家又謂月有九行：黑道二，出黃道北；赤道二，出黃道南；白道二，出黃道西；青道二，出黃道東；并黃道而九。如此，卽日月之行，其道各異。况陽用事，則日進而北，晝進而長，陰用事，則日退而南，晝退而短。月行則春東從青道，夏南從赤道，秋西從白道，冬北從黑道。日月之行，其不同道又如此。然每月合朔，不知何以同度而會於所會之辰？又有或蝕或不蝕，悉未能曉。向承指喻其行，或高而出黃道之上，或低而出黃道之下，或相近而偏，或差

遠而不相值。則皆不蝕。是時不能反覆。今望賜譔。

答曰。日月道之說。所引皆是日之南北。雖不同。然皆隨黃道耳。

月道雖不同。然亦常隨黃道。而出其旁耳。其合朔時。日月同在

一度。其望日。則日月極遠而相對。其上下弦。則日月近一而遠。

三。

如日在午。則月在卯。或在酉之類。

故合朔之時。日月之東西。雖同在一度。而

月道之南北。或差遠於日。則不蝕。或南北雖亦相近。而日在內。

月在外。則不蝕。此正如一人秉燭。一人執扇。相交而過。一人自

內觀之。其兩人相去差遠。則雖扇在內。燭在外。而扇不能掩燭。

或秉燭在內。而執扇在外。則雖近而扇亦不能掩燭。以此推之。

大略可見。此說在詩十月之交篇。孔註說得甚詳。李迂仲引證。

傳宗理要
亦博可并檢看當得其說

答張敬之
論潮汐進退之義

潮汐之說余襄公言之尤詳大抵天地之間東西爲緯南北爲經故子午卯酉爲四方之正位而潮之進退以月至此位爲節耳以氣之消息寒之則子者陰之極而陽之始午者陽之極而陰之始卯爲陽中酉爲陰中也

語錄

太極

問太極不是未有天地之先有箇渾成之物是天地萬物之理
總名否曰太極只是天地萬物之理在天地言則天地中有
太極在萬物言則萬物中各有太極未有天地之先畢竟是
先有此理動而生陽亦只是理靜而生陰亦只是理問太極
解何以先動而後靜先用而後體先感而後寂曰在陰陽言
則用在陽而體在陰然動靜無端陰陽無始不可分先後今
只就起處言之畢竟動前又是靜用前又是體感前又是寂
陽前又是陰而寂前又是感靜前又是動將何者爲先後不

可只道今日動便爲始而昨日靜更不說也如鼻息言呼吸則辭順不可道吸呼畢竟呼前又是吸吸前又是呼

淳

有是理後生是氣自一陰一陽之謂道推來此性自有仁義

明德

天下未有無理之氣亦未有無氣之理

錄

問理與氣曰有是理便有是氣但理是本而今且從理上說氣如云太極動而生陽動極而靜靜而生陰不成動已前便無靜程子曰動靜無端蓋此亦是且自那動處說起若論着動以前又有靜靜以前又有動如云一陰一陽之謂道繼之者善也這繼字便是動之端若只一開一闔而無繼便是闔殺了又問繼是動靜之間否曰是靜之終動之始也且如四時

到得冬月萬物都歸窠了。若不生來年便都息了。蓋是貞復生元無窮如此。又問元亨利貞是備箇動靜陰陽之理。而易只謂乾有之。曰若論文王易本是作大亨利貞只作兩字說。孔子見這四字好便挑開說了。所以某嘗說易難看便是如此。伏羲自是伏羲易文王自是文王易孔子因文王底說又却出入乎其間也。又問有是理而後有是氣未有人時此理何在。曰也只在這裏如一海水或取得一杓或取得一擔或取得一椀都是這海水但是他爲主我爲客他較長久我得之不久耳。夔孫

或問必有是理然後有是氣如何。曰此本無先後之可言然必

欲推其所從來則須說先有是理然理又非別爲一物卽存乎是氣之中無是氣則是理亦無掛搭處氣則爲金木水火理則爲仁義禮智人傑

太極圖無極而太極上一圈卽太極但挑出在上泳

無極而太極只是一句如冲漠無朕畢竟是上面無形象然却實有此理圖上自分曉到說無極處便不言太極只言無極之真真便是太極當

或問太極曰太極只是個極好至善底道理人人有一太極物物有一太極周子所謂太極是天地人物萬善至好底表德

天地

道夫言向者先生教思量天地有心無心近思之竊謂天地無心仁便是天地之心若使其有心必有思慮有營爲天地曷嘗有思慮來然其所以四時行百物生者蓋以其合當如此便如此不待思維此所以爲天地之道曰如此則易所謂復其見天地之心正大而天地之情可見又如何如公所說祇說得他無心處爾若果無心則須牛生出馬桃樹上發李花他又却自定程子曰以主宰謂之帝以性情謂之乾他這名義自定心便是他箇主宰處所以謂天地以生物爲心中間欽夫以爲甚不合如此說某謂天地別無勾當只是以生物爲心一元之氣運轉流通略無停間只是生出許多萬物而

已問程子謂天地無心而成化聖人有心而無爲曰這是說
天地無心處且如四時行百物生天地何所容心至於聖人
則順理而已復何爲哉所以明道云天地之常以其心普萬
物而無心聖人之常以其情順萬事而無情說得最好問普
萬物莫是以心周徧而無私否曰天地以此心普及萬物人
得之遂爲人之心物得之遂爲物之心草木禽獸接着遂爲
草木禽獸之心只是一箇天地之心爾今須要知得他有心
處又要見得他無心處只恁定說不得道夫

蒼蒼之謂天運轉周流不已便是那箇而今說天有箇人在那
裏批判罪惡固不可說道全無主之者又不可這裏要人見

得。

又儒問經傳中天字曰要人自看得分曉。也有說蒼蒼者也有說主宰者也有單訓理時。

天以氣而依地之形。地以形而附天之氣。天包乎地。地特天中之一物爾。天以氣而運乎外。故地擁在中間。隤然不動。使天之運有一息停。則地須陷下。

道夫

地有絕處。唐太宗收至骨利幹。置堅昆都督府。其地夜易曉。夜亦不甚暗。蓋當地絕處。日影所射也。其人髮皆赤。

楊

問康節論六合之外。恐無外否。曰。理無內外。六合之形。須有內外。日從東畔升。西畔沉。明日又從東畔升。這上面許多。下面亦許多。豈不是六合之內。曆家算氣。只算得到日月星辰運。行處上去。更算不得。安得是無內外。

淳

問四時取火何爲季夏又取一番曰土旺於未故再取之

陰以陽爲質陽以陰爲質水內明而外暗火內暗而外明橫渠

曰陰陽之精互藏其宅正此意也

坎離道夫

清明內影濁明外影清明金水濁明火日

儒

如何見得天有三百六十度甚麼人去量來只是天行得過處爲度天之過處便是日之退處日月會爲辰節

叔器問天有幾道曰據曆家說有五道而今且將黃赤道說赤

道正在天之中如合子縫模樣黃道是在那赤道之間

義剛

問天道左旋日月星辰右轉曰自疏家有此說人皆守定某看天上日月星不曾右轉只是隨天轉天行健這箇物事極是

轉得速。且如今日。日與月星都在這度上。明日旋一轉。天却過了一度。日遲些。便欠了一度。月又遲些。又欠了十三度。如歲星須一轉。爭了三十度。要看曆數子細。只是璇璣玉衡。疏載王莽渾天說一段。極精密。可檢看。便是說一箇現成天地了。月常光。但初二三日。照只照得那一邊。過幾日。漸漸移得正。到十五日月與日正相望。到得月中天時。節日光在地下。迸從四邊出。與月相照。地在中間。自遮。不過今月中有影。云是莎羅樹。乃是地形。未可知。賀孫

問經星左旋。緯星與日月右旋。是否。曰。今諸家是如此說。橫渠說天左旋。日月亦左旋。看來橫渠之說。極是。只恐人不曉。所

以詩傳只載舊說或曰此亦易見如以一大輪在外一小輪載日月在內大輪轉急小輪轉慢雖都是左轉只有急有慢便覺日月似右轉了曰然但如此則曆家逆字皆着改做順字退字皆着進字

備

月體常圓無闕但常受日光爲明初三四是日在下照月在西邊明人在這邊望只見在弦光十五六則日在地下其光由地四邊而射出月被其光而明月中是地影月古今人皆言有闕惟沈存中云無闕

揚

月無盈闕人看得有盈闕蓋晦日則月與日相疊了至初三方漸漸離開去人在下面側有見則其光闕至望日則月與日

正相對人在中間正看見則其光方圓因云禮運言播五行於四時和而後月生也如此則氣不和時便無月恐無此理其云三五而盈三五而闕彼必不曾以理推之若以理推之則無有盈闕也畢竟古人推究事物似亦不甚子細或云恐是說元初有月時曰也說不得壽

問月受日光只是得一邊光曰日月相會時日在月上不是無光光都載在上面一邊故地上無光到得日月漸漸相遠時漸擦挫月光漸漸見於下到得望時月光渾在下面一邊望後又漸漸光向上去泳

或問月中黑影是地影否曰前輩有此說看來理或有之然非

地影乃是地形倒去遮了他光耳如鏡子中被一物遮住其光故不甚見也蓋日以其光加月之魄中間地是一塊實底物事故光照不透而有此黑暈也問日光從四邊射入月光何預地事而礙其光曰終是被這一塊實底物事隔住故微有礙耳

或錄云今人剪帛人貼鏡中以火光照之則壁上圓光中有一人月爲地所礙其黑暈亦猶是耳

問自古以日月之蝕爲災異如今曆家却自預先算得是如何曰只大約可算亦自有不合處有曆家以爲當食而不食者有以爲不當食而食者

木之

緯星是陰中之陽經星是陽中之陰蓋五星皆是地上木火土金水之氣上結而成却受日光經星却是陽氣之餘凝結者

疑得也。受日光。但經星則閃爍開闔。其光不定。緯星則不然。縱有芒角。其本體之光亦自不動。細視之可見。個

霜只是露結成。雪只是雨結成。古人說露是星月之氣。不然。今高山頂上。雖晴亦無露。露只是自下蒸上。人言極西高山上

亦無雨雪。廣

高山無霜露。却有雪。嘗登雲谷。晨起穿林薄中。並無露水沾衣。但見烟霞在下。茫然如大洋海。衆山僅露峰尖。烟雲環繞。往來山如移動。天下之奇觀也。或問高山無霜露。其理如何。曰。上面氣漸清。風漸緊。雖微有霧氣。都吹散了。所以不結。若雪則只是雨遇寒而凝。故高寒處雪先結也。道家有高處有萬

里剛風之說便是那裏氣清緊低處則氣濁故緩散想得高山更上去立人不住了那裏氣又緊故也離騷有九天之說注脚妄解云有九天據某觀之只是九重蓋天運行有許多重數以手畫圖暈自內裏面重數較軟至外面則漸硬想到第九重只成硬殼相似那裏轉得又愈緊矣個

雪花所以必六出者蓋只是霰下被猛風拍開故成六出如人擲一團爛泥於地泥必潛開成稜瓣也又六者陰數太陰玄精石亦六稜蓋天地自然之數個

問龍行雨之說曰龍水物也其出而與陽氣交蒸故能成雨但尋常雨自是陰陽氣蒸鬱而成非必龍之爲也密雲不雨尚

往也。蓋止是下氣上升。所以未能雨。必是上氣蔽蓋。無發洩處。方能有雨。橫渠正蒙論風雷雲雨之說最分曉。木之

問雷電。程子曰。只是氣相摩軋。是否。曰。然。或以爲有神物。曰。氣聚則須有。然纔過便散。如雷斧之類。亦是氣聚而成者。但已有查滓。便散不得。此亦屬成之者性。張子云。其來也幾微。易簡。其究也廣大堅固。卽此理也。楷

十月雷鳴。曰。恐發動了。陽氣。所以大雪爲豐年之兆者。雪非豐年。蓋爲凝結得。陽氣在地。來年發達。生長萬物。敬仲

虹非能止雨也。而雨氣至是已薄。亦是日色射散雨氣了。楊

子升問人言虜中曆與中國曆差一日。是否。曰。只如子正四刻

方屬今日。子初自屬昨日。今人纔交子時。便喚做今日。如此亦便差一日。木之

問周公定豫州爲天地之中。東西南北各五千里。今北邊無極。而南方交趾便際海。道里長短夙殊。何以云各五千里。曰。此但以中國地段四方相去言之。未說到極邊與際海處。南邊雖近海。然地形則未盡。如海外有島夷諸國。則地猶連屬。彼處海猶有底。至海無底處。地形方盡。周公以土圭測天地之中。則豫州爲中。而南北東西。際天各遠許多。至於北遠而南近。則地形有偏。爾所謂地不滿東南也。禹貢言東西南北各二千五百里。不知周公何以言五千里。今視中國四方相去

無五千里想他周公且恁大說教好看如堯舜所都冀州之地去北方甚近是時中國土地甚狹想只是略相羈縻至夏商已後漸漸開闢如三苗只在今洞庭彭蠡湖湘之間彼時中國已不能到三苗所以也負固不服又曰自古無人窮至北海只挨着天殼邊過緣北邊地長其勢北海不甚濶地之下與地之四邊皆海水周流地浮水上與天接天包水與地問天有形質否曰無只是氣旋轉得緊如急風然至上面極高處轉得愈緊若轉纔慢則地便脫墜矣問星辰有形質否曰無只是氣之精英凝聚者或云如燈花否曰然個

海那岸便與天接或疑百川赴海而海不溢曰蓋是乾了有人

見海邊作旋渦吸水下去者

直卿云程子大鑑
講之說好方子

海水未嘗溢者莊周所謂沃焦土是也

德明

潮之遲速大小自有常舊有明州人說月加子午則潮長自有

此理沈存中筆談說亦如此

德明

陸子靜謂潮是子午月長沈存中續筆談之說亦如此謂月在

地子午之方初一卯十五酉

方子

蔡伯靖曰山本同而末異水本異而末同

義

問先生前日言水隨山行何以驗之曰外面底水在山下中間
底水在脊上行因以指爲喻曰外面底水在指縫中行中間
底水在指頭上行又曰山下有水今浚井底人亦看山脉

節

冀都是正天地中間好箇風水山脉從雲中發來雲中正高脊處自脊以西之水則西流入於龍門西河自脊以東之水則東流入於海前面一條黃河環繞右畔是華山聳立爲虎自華來至中爲嵩山是爲前案遂過去爲泰山聳於左是爲龍淮南諸山是第二重案江南諸山及五嶺又爲第三四重案

淳

上黨卽今潞州春秋赤狄潞氏卽其地也以其地極高與天爲黨故曰上黨上黨太行山之極高處平陽晉州蒲坂山之盡頭堯舜之所都也河東河北諸州如太原晉陽等處皆在山之兩邊窠中山極高濶

伊川云太行千里一塊石

山後是忻代諸州泰山

却是太行之虎山。又問平陽蒲坂自堯舜後何故無人建都。
曰其地磽脊不生物。人民朴陋儉嗇。故惟堯舜能都之。後世
侈泰如何都得。個

或問天下之山。西北最高。曰然。自關中一支生下。函谷以至嵩
山東盡泰山。此是一支。又是嶓冢。漢水之北生下一支。至揚
州而盡江南諸山。則又自岷山分一支。以盡乎兩浙閩廣。個

江西山皆自五嶺贛上來。自南而北。故皆逆。閩中却是自北而
南。故皆順。揚

閩中之山多自北來。水皆東南流。江浙之山多自南來。水多北
流。故江浙冬寒夏熱。個

江西山水秀拔。生出人來。便要硬做。升卿

荆襄山川平曠。得天地之中。有中原氣象。爲東南交會處。耆舊

人物多。最好卜居。但有變。則正是兵之衝。又恐無噍類。義

某說道。後來黃河。必與淮河相并。伯恭說。今已如此。問他如何

見得。伯恭說。見薛某說。又曰。元豐間。河北流。自後中原多事。

後來南流。虜人亦多事。近來又北流。見歸正人說。或錄云。因

中原圖。黃河却自西南貫梁山泊。迤邐入淮。來祖又曰。神宗

宗時。河北流。故虜人盛。今却南來。故其勢亦衰。時行淤田策。行得甚力。差官去監那箇水。也是肥。只是未蒙

其利。先有衝頽廬舍之患。潘子善問如何可治河決之患。曰。

漢人之策。令兩旁不立城邑。不置民居。存留些地步與他。不

與他爭放教他寬水散漫或流從這邊或流從那邊不似而今作堤去扞他元帝時募善治河決者當時集衆議以此說爲善又問河決了中心平處却低如何曰不會低他自擇一箇低去處又問雍州是九州那裏高曰那裏無甚水又曰禹貢亦不可考其次第那如經量門簿所謂門簿者載此一都有田若干有山若干節

鬼神

天下大底事自有箇大底根本小底事亦自有箇緊切處若見得天下亦無甚事如鬼神之事聖賢說得甚分明只將禮熟讀便見二程初不說無鬼神但無如今世俗所謂鬼神耳古

來聖人所制祭祀皆是他見得天地之理如此去偽

鬼神只是氣屈伸往來者氣也天地間無非氣人之氣與天地之氣常相接無間斷人自不見人心才動必達於氣便與這屈伸往來者相感通如卜筮之類皆是心自有此物只說你心上事才動必應也格

問鬼神便只是此氣否曰又是這氣裏面神靈相似燾

雨風露雷日月晝夜此鬼神之迹也此是白日公平正直之鬼神若所謂有嘯於梁觸於胸此則所謂不正邪暗或有或無或去或來或聚或散者又有所謂禱之而應祈之而獲此亦所謂鬼神同一理也世間萬事皆此理但精粗小大之不同

爾。又曰。以功用謂之鬼神。卽此便見。道夫

問生死鬼神之理。

明作錄云。問鬼神生死。雖知得是一理。然未見得端的。曰。精氣爲物。遊魂爲變。便是生死。

底道理未達。曰。精氣一則爲人。散則爲鬼。又問。精氣凝時。此理便附在氣上否。曰。天道流行。發育萬

物。有理而後有氣。雖是一時。都有畢竟以理爲主。人得之以

有生。

明作錄云。然氣則有清濁。

氣之清者爲氣。濁者爲質。

明作錄云。清者屬陽。濁者屬陰。

知覺運動。陽之爲也。形體。

明作錄作骨肉皮毛。

陰之爲也。氣曰魂。體曰魄。

高誘淮南子註曰。魂者陽之神。魄者陰之神。所謂神者。以

其主乎形氣也。人所以生。精氣聚也。人只有許多氣。須有箇

盡時。

明作錄云。醫家所謂陰陽不升降是也。

盡則魂氣歸於天。形魄歸於地。而

死矣。人將死時。熱氣上出。所謂魂升也。下體遊冷。所謂魄降

也。此所以有生必有死，有始必有終也。夫聚散者，氣也。若理則只泊在氣上，初不是凝結自爲一物，但人分上所合當然者，便是理，不可以聚散言也。然人死雖終歸於散，然亦未便散盡。故祭祀有感格之理。先祖世次遠者，氣之有無不可知。然奉祭祀者，既是他子孫，畢竟只是一氣，所以有感通之理。然已散者不復聚。釋氏却謂人死爲鬼，鬼復爲人，如此則天地間常只是許多人來來去去，更不由造化生生，必無是理。至如伯有爲厲，伊川謂別是一般道理。蓋其人氣未當盡而強死，自是能爲厲。子產爲之立後，使有所歸，遂不爲厲，亦可謂知鬼神之情狀矣。問伊川言鬼神造化之迹，此豈亦造化

之迹乎曰皆是也。若論正理則似樹上忽生出花葉此便是造化之迹。又如空中忽然有雷霆風雨皆是也。但人所常見故不之怪。忽聞鬼嘯鬼火之屬則便以爲怪。不知此亦造化之迹。但不是正理故爲怪異。如家語云山之怪曰夔魍魎水之怪曰龍罔象土之怪曰羆羊皆是氣之雜揉垂戾所生亦非理之所無也。專以爲無則不可。如冬寒夏熱此理之正也有時忽然夏寒冬熱豈可謂無此理。但旣非理之常便謂之怪。孔子所以不語學者亦未須理會也。因舉似南軒不信鬼神而言 閔祖問鬼神便是精神魂魄如何曰然且就這一身看自會笑語有許多聰明知識這是如何得恁地虛空之中忽然有風有雨。

忽然有雷有電。這是如何得恁地。這都是陰陽相感。都是鬼神。看得到這裏。見一身只是箇軀殼在這裏。內外無非天地陰陽之氣。所以夜來說道。天地之塞。吾其體。天地之帥。吾其性。思量來。只是一箇道理。又云。如魚之在水。外面水便是肚裏面水。鰕魚肚裏水。與鯉魚肚裏水。只一般。仁父問魂魄如何。是陰陽。曰。魂如火。魄如水。

賀孫

問魂魄。曰。魄是一點精氣。氣交時便有這神。魂是發揚出來底。如氣之出入息。魄是如水。人之視能明。聽能聰。心能強記底。有這魄。便有這神。不是外面入來。魄是精。魂是氣。魄主靜。魂主動。又曰。草木之生。自有箇神。他自不能生。在人則心便是。

所謂形既生矣神發知矣是也。又問生魂死魄。曰：古人只說三五而盈，三五而闕。近時人方推得他所以圓闕，乃是魂受光處，魄未嘗無也。人有魄先衰底，有魂先衰底。如某近來覺重聽多忘，是魄先衰。植

動者魂也，靜者魄也。動靜二字，括盡魂魄。凡能運用作為，皆魂也。魄則不能也。今人之所以能運動，都是魂使之爾。魂若去，魄則不能也。今魄之所以能運體，便死矣。月之黑暈，便是魄其光者，乃日加之光耳。他本無光也。所以說哉生魄，旁死魄。莊子曰：日火外影，金水內影。此便是魂魄之說。有脫誤
人之能思慮計畫者，魂之爲也。能記憶辨別者，魄之爲也。個

問人死時是當初稟得許多氣氣盡則無否曰是曰如此則與
天地造化不相干曰死生有命當初稟得氣時便定了便是
天地造化只有許多氣能保之亦可延且如我與人俱有十
分俱已用出二分我才用出二分便收回及收回二分時那
人已用出四分了所以我便能少延此卽老氏作福意老氏
惟見此理一向自私其身淳

死而氣散泯然無迹者是其常道理恁地有托生者是偶然聚
得氣不散又怎生去湊着那生氣便再生然非其常也伊川

云左傳伯有之爲厲又別是一理言非死生之常理也人傑

光祖問先生所答嵩卿書

云

如伊川又云伯有爲厲別是一

理又如何。曰亦自有這般底。然亦多是不得其死。故強氣未散。要之久之。亦不會不散。如漳州一件公事。婦殺夫。密埋之後。爲祟。事旣發覺。當時便不爲祟。此事恐奏裁免死。遂於申諸司狀上特批了。後婦人斬。與婦人通者絞。以是知刑獄裏面這般事。若不與決罪償命。則死者之冤必不解。又曰氣久必散。人說神仙一代說一項。漢世說甚安期生。至唐以來。則不見說了。又說鍾離權。呂洞賓。而今又不見說了。看得來。他也只是養得分外壽考。然終久亦散了。賀孫

問遊魂爲變。間有爲妖孽者。是如何得未散。曰遊字是漸漸散。若是爲妖孽者。多是不得其死。其氣未散。故鬱結而成妖孽。

若是疴羸病死底人。這氣消耗盡了。方死。豈復更變結成妖孽。然不得其死者。久之亦散。如今打麵做糊。中間自有成小塊核不散底。久之漸漸也自會散。又如其取精多。其用物弘。如伯有者。亦是卒未散也。橫渠曰。物之初生。氣日至而滋息。物生既盈。氣日反而遊散。至之謂神。以其伸也。反之謂鬼。以其歸也。天下萬物萬事。自古及今。只是箇陰陽消息屈伸。橫渠將屈伸說得貫通。上蔡說却似不說得循環意思。宰我曰。吾聞鬼神之名。不知其所謂。子曰。氣也者。神之盛也。魄也者。鬼之盛也。合鬼與神。教之至也。注謂口鼻嘘吸爲氣。耳目聰明爲魄。氣屬陽。魄屬陰。而今有人說眼光落。這便是魄降。今

人將死有云魄落若氣只升而散故云魂氣歸於天形魄歸於地道家修養有這說與此大段相合賀孫

論及巫人治鬼而鬼亦效巫人所爲以敵之者曰後世人心姦詐之甚感得姦詐之氣做得鬼也姦巧淳

厚之問人死爲禽獸恐無此理然親見永春人家有子耳上有猪毛及猪皮如何曰此不足怪向見籍溪借事一兵胸前有猪毛睡時作猪鳴此只是稟得猪氣可學

自天地言之只是一箇氣自一身言之我之氣卽祖先之氣亦只是一箇氣所以才感必應

因問何故天曰神地曰祇人曰鬼曰此又別氣之清明者爲神

如日月星辰之類是也。此變化不可測。祇本示字以有通之。可示山河草木是也。比天象又差者。至人則死爲鬼矣。又問。旣曰往爲鬼。何故謂祖考來格。曰。此以感而言。所謂來格。亦略有些神底意思。以我之精神。感彼之精神。蓋謂此也。祭祀之禮。全是如此。且天子祭天地。諸侯祭山川。大夫祭五祀。皆是自家精神。抵當得他過。方能感召得他來。如諸侯祭天地。大夫祭山川。便沒意思了。雒

問祖考精神旣散。必須三日齋。七日戒。求諸陽。求諸陰。方得他聚。然其聚也。倏然而聚。到得禱祠旣畢。誠敬旣散。則又忽然而散。曰然。子蒙

問死者魂氣既散而立主以主之亦須聚得此子氣在這裏否
曰古人自始死弔魂復魄立重設主便是常要接續他此子
精神在這裏古者爨龜用牲血便是覺見那龜久後不靈了
又用些子生氣去接續他史記上龜筮傳占春將雞子就上
面開卦便也是將生氣去接他便爨龜之意又曰古人立
尸也是將生人生氣去接他

子蒙

問祭天地山川而用牲幣酒醴者只是表吾心之誠耶抑真有
氣來格也曰若道無物來享時自家祭甚底肅然在上令人
奉承敬畏是甚物若道真有雲車擁從而來又妄誕

淳

或問世有廟食之神絲歷數百年又何理也曰浸久亦能散黃

寧南康緣久旱不免徧禱於神忽到一廟但有三間弊屋狼籍之甚。彼人言三五十十年前其靈如響。至有人來而帷中有神與之言者。昔之靈如彼。今之靈如此。亦自可見。壯祖

風俗尚鬼。如新安等處。朝夕如在鬼窟。某一番歸鄉里。有所謂五通廟。最靈怪。衆人捧擁。謂禍福立見。居民纔出門。便帶紙片入廟祈祝。而後行。士人之過者。必以名紙稱門生。某人謁廟。某初還。被宗人煎迫令去。不往。是夜會族人往官司打酒。有灰乍飲。遂動臟肺。終夜。次日又偶有一蛇在階旁。衆人閔然以爲不謁廟之故。某告以臟肺是食物不着。關他甚事。莫枉了五通。中有某人是向學之人。亦來勸往。云亦是從衆。某

告以從衆何爲不意公亦以此語某幸歸此去祖墓甚近若能爲禍福請卽葬某於祖墓之旁甚便又云人做州郡須去淫祠若係勅額者則未可輕去賀孫

問道理有正則有邪有是則有非鬼神之事亦然世間有不正之鬼神謂其無此理則不可曰老子謂以道蒞天下者其鬼不神若是王道修明則此等不正之氣都消鑠了人傑

曆法

今之造曆者無定法只是趕趁天之行度以求合或過則損不及則益所以多差因言古之鍾律紐算寸分毫釐絲忽皆有定法如合符契皆自然而然莫知所起古之聖人其思之如

是之巧。然皆非私意撰爲之也。意古之曆書亦必有一定之法。而今亡矣。三代而下。造曆者紛紛。莫有定議。愈精愈密。而愈多差。由不得古人一定之法也。季通常言天之運無常。日月星辰積氣。皆動物也。其行度疾速。或過不及。自是不齊。使我之法能運乎天而不爲天之所運。則其疎密遲速。或過不及之間。不出乎我此虛寬之大數。縱有差忒。皆可推而不失矣。何者。以我法之有定。而律彼之無定。自無差也。季通言非是天運無定。乃其行度如此。其行之差處。亦是常度。但後之造曆者。其爲數窄狹。而不足以包之爾。開

問曆法何以推月之大小。曰。只是以每月二十九日半。上六百四

十分日之二十九計之。觀其合朔爲如何。如前月大。則後月

初二日月生明。前月小。則後月初三日月生明。人傑

中氣只在本月。若躋得中氣在月盡。後月當便置閏。揚

曆數微眇。如今下漏一般。漏管稍澀。則必後天。稍潤。則必先天。

未子而子。未午而午。淵

曆法季通說。當先論天行。次及七政。此亦未善。要當先論太虛。

以見三百六十五度四分度之一。一一定位。然後論天行。以

見天度。加損虛度之歲分。歲分既定。然後七政乃可齊耳。道

先生嘗言。數家有大小陽九。道夫問果爾。則有國有家者。何貴

乎修治。曰。在我者。過得他一二分。便足以勝之。數

八卷終